

**KALIKATA LITTLE MAGAZINE LIBRARY-O-GABESHANA KENDRA**  
**18/M TAMER LANE, KOLKATA-700009**

Record No. : KLMLGK 2007/	Place of Publication : <i>কলিকাতা, ২০২ গাবেশানা কেন্দ্র</i>
Collection : KLMLGK	Publisher : <i>কলিকাতা কবি</i>
Title : <i>কবিতা</i> (KAVITA)	Size : 5.5" x 8.5"
Vol. & Number : <i>12/2</i> <i>15/2</i> <i>15/3</i> <i>17/2</i> <i>18/2</i>	Year of Publication : <i>Dec 1946</i> <i>March 1950</i> <i>(ফাল্গুন ১৩৫৭)</i> <i>Dec 1952</i> <i>Feb 1954</i>
	Condition : <i>Brittle</i> / <i>Good</i> ✓
Editor : <i>কলিকাতা কবি</i>	Remarks :

C.D. Roll No. : KLMLGK

# কর্কট

পঞ্চদশ বর্ষ : তৃতীয় সংখ্যা

প্রবন্ধ

আজকের দিনে বীরবল

অরুণকুমার সরকার

মাণ্ডাল গান

সুরজিৎ সিংহ

কবিতা

বিষ্ণু দে, জীবনানন্দ দাশ, মণীন্দ্র রায়, দেবদাস পাঠক,

মুকুল ভট্টাচার্য, দেবব্রত সেনগুপ্ত, জয়ন্তী সিংহ, অরবিন্দ গুহ

সরোজ বন্দ্যোপাধ্যায়, সোমনাথ বন্দ্যোপাধ্যায়,

বটকুমার দে, নরেশ গুহ

সমালোচনা

নরেশ গুহ

বার্ষিক চার টাকা



প্রতি সংখ্যা এক টাকা

সম্পাদক : বুদ্ধদেব বসু



## কবিতা

পুরোনো সংখ্যা

পরিবর্তিত তালিকা

১৩৪৪	পৌষ, চৈত্র
১৩৪৫	আষাঢ়, চৈত্র
১৩৪৬	আশ্বিন
১৩৪৮	আশ্বিন, কাतिक, চৈত্র
১৩৪৯	আশ্বিন, পৌষ
১৩৫০	আষাঢ়, আশ্বিন, পৌষ
১৩৫১	আশ্বিন, চৈত্র
১৩৫২	আষাঢ়

প্রতি সংখ্যা এক টাকা

সবগুলি একসঙ্গে ২৫% কম

[ মাণ্ডল বত্বর ]

সম্পূর্ণ সেট

একাদশ বর্ষ	৩
দ্বাদশ বর্ষ	৪
ত্রয়োদশ বর্ষ	৫
চতুর্দশ বর্ষ	৬
একাদশ ও দ্বাদশ একসঙ্গে	৭
একাদশ, দ্বাদশ ও ত্রয়োদশ একসঙ্গে	৮
চার বছর একসঙ্গে	১০

প্রতিভা বহুর গল্প ও উপজ্ঞান

সুমিত্রার অপমৃত্যু ৪

মনোলীনা ২১০

বিচিত্র হৃদয় ২

সেতুবন্ধ ২১০

অপরূপা ১০

THE WISDOM OF AN ANCIENT  
SAGE RENDERED BY  
A MODERN MASTER

## CONFUCIUS

The Unwobbling Pivot & The  
Great Digest translated with  
notes & commentary by

## EZRA POUND

Handsome Indian Edition: Rs. 2/8/-

Published for  
KAVITABHAVAN  
by

ORIENT LONGMANS LTD.  
17, Chittaranjan Avenue, Calcutta 13  
Nicol Road, Ballard Estate, Bombay  
36 A, Mount Road, Madras.  
Also available at Kavita bhavan.

কবিতাভবন : ২০২ রাসবিহারী এভিনিউ, কলকাতা ২৯



# কবিতা

পঞ্চদশ বর্ষ, তৃতীয় সংখ্যা

বৈশাখ ১৩৫৭

ক্রমিক সংখ্যা ৬৫

জল দাও

বিষ্ণু দে

ফাল্গুন আরম্ভে তার—

এক হিসাবে অবশ্য মাখেই,

কিন্মা তারো আগে,

ও বছরে—বা আর বছরে

বছরে বছরে দীর্ঘ প্রকৃতির কর্মসূত্রে অথবা নিয়মে

ছোটো ঘেরা মাটির সংযমে

হাওয়ার মুক্তিগে গাঁথা সরস সজল সংকল্পে গভীর

গন্ধের আলাপ তার বাজে

পাপড়িতে পাপড়িতে তার পরাগের পাখোয়াজে

ও বছরে বর্ষার সজল মিছিলে

কিন্মা তারো আগে বৃষ্টি পাঁচ বছরের দীর্ঘ দূর অভিযানে

প্রাণের প্রয়াসে আজ প্রচুরতা তার

তাই আজ

যখন আকাশে নামে নির্জন বিষাদ

অন্ধকার পরোয়ানা শিমুলের লালে

গোলমোরের সোনাও পাড়ুর

শালিকের একাতান থেমে যায় জামরুল বাগানে

কলকাতার কাক আর সমুদ্রের বকের বলাকা বহুদূর  
তখনই কুঁড়িতে লাগে অধরা আবেগ কোন্  
বসন্তবাহারের লাগে সহিষ্ণু হৃদয়ে খেরোথের।  
প্রচণ্ড যন্ত্রণাস্পন্দে একাত্ত্র নিদে'শে  
আনন্দে নিমেষহীন রূপান্তরে সৃষ্টিতে আকুল

তারপরে আলো জ্বালি

বন্ধু কিম্বা বইয়ের আশ্রয়ে

কিন্মা খবর শুনি দাস্তার কোথাও ক্লাস্ত

সন্ধ্যার প্রান্তরে এসে নিঃস্বার্থ আকাশে দেখি

ফুটে আছে শান্ত শুচি

সময়ের জড়ো করা ভুল একটি মুহূর্তে ধুয়ে

বিনীত পদ্বীর মতো নিশ্চিন্ত অথচ দাস্ত

কর্মের সন্নিহিত স্তব্দ

অস্বাস্ত সম্পূর্ণ সন্তা

রাত্রির নক্ষত্রে যেন প্রকৃতিস্থ অস্তিত্বের আকাশে স্বাবীন

একরাশ শাদা বেল ফুল।

গরমে বিবর্ণ হ'ল গোলমোরের সাবেক জ্বালুয়—

কৃষ্ণচূড়া চোখে আনে জ্বাল

রৌদ্রের কুয়াশা জ্বলে মরা মরা পোড়া লেবান'মে

এখানে ওখানে দেখ দেশজাড়া লোক ছায়ায় হাঁপায়

পার্কের ধারে শানে পথে পথে গাড়িবান্দায়

ভাবে ওরা কি যে ভাবে! ছেড়ে খোঁজে দেশ

এইখানে কেউ বরিশালে কেউ কেউ বা ঢাকায়

গরম হাওয়ায় ঝরে নীল আর বেগনি ফুরাব

কৃষ্ণচূড়া নির্নিমেঘ টেনে চলে টেনে মালাবদলের পালা

খুঁজে খুঁজে যমুনার স্নিগ্ধ ছায়া তিহ্ন গরমে

এখানে ওখানে দেখ কতো ঘরছাড়া লোক ছায়ায় হাঁপায়

পার্কের ছাউনিতে পথে ম্যানসনের বাবান্দায় শানের শয্যায়

কি যে ভাবে ঘর ছেড়ে খোঁজে বৃষ্টি দেশ

কোথায় যে যাবে ভাবে হাওড়ায় নাকি সে ঢাকায়

আমাদের ঘরে ঘরে আমরাও নানান মানুহ

গেয়ে চলি চুপি চুপি আমাদের পালা

কিন্মা গাই না আর মাথা নাড়ি পোড়া মাথা গরমে নরমে

থেকে থেকে হয়তো বা আমাদের কেউ কেউ মরীয়া হাঁপায়

জীবনে মৃত্যুতে কিন্মা মৃত্যুতে জীবনে ভগ্ন ব্যর্থ অসহায়

কি যে ভাবে কর্মহীন অর্থহীন অচেনা স্বদেশ

কোথায় যে যাবে ভাবে কোন্ দেশ শীতল বর্ষায়

কারণ দেখেছে সব গোবি মরুভূতে এক যাত্রা কতো সহস্র পুরুষ

যাত্রী অভিযাত্রী চলে দেখেছে তো তুবারের দেশে জয়মালা

গলায় ছলিয়ে চলে বিজ্ঞানের মৈত্রীর মরমে

মানুষের প্রেমে বীর দগ্ধমেরু কিন্মা দগ্ধ মধ্য এশিয়ায়

গমের ধানের ক্ষেতে প্রাণের আশ্বিন আনে স্টেপে ও তুঙ্গায়

বিজয়ী বসতি আনে সচ্ছল বসতি আনে উন্মুখর দেশ

কতো চেলিউস্কিন হাওড়ায় চাটগাঁয় বাঁকুড়ায় চলেছে ঢাকায়

হয়তো বা নিরুপায়

হয়তো বা বিজিঞ্জের যন্ত্রণাই বতমানে ইতিহাস

বাগিচা মরা নদী জলহীন পায়ে পানপায়

অথচ বৈশাখী হাওয়া বাংলার সমুদ্রের

আমের মুকুলে ফল

রাশি রাশি বেলমল্লিকায়

বাগান বিহ্বল আজ কালেরই বাগান

তবু লুকু রুদ্রের মাঘের

পাতাঝরা পাতাঝরানোর ক্ষোভের রাগের

তবু সেই বাঁচার-মরার মরীয়া যন্ত্রণা চলে

আমাদের দিনের শিকড়ে রাত্রির পল্লবে

যদি বা হতুম ফুল, বইতুম দক্ষিণের হাওয়া

রইতুম নিম্পলক রূপাঙ্কুরে ক্রম নিত্য চাঁদ

কিন্তু আমরা যে পৃথিবীর আমরা মাঘ

আমাদেরই অজ্ঞানের স্রোতে গড়ি ভবিষ্যৎ

একলে ওকলে আমাদেরই বর্তমানে

কিছুটা উদ্ভূত সন্দেহ—বৃষ্টি কিম্বা আতেসী জলে।

কমিষ্ট যন্ত্রণা না হ'লে বলব তীক্ষ্ণ প্রতীক্ষায়

আততির আবর্ত' সেতুতে ঘেঁষাঘেঁষি

আমাদের উত্তরাধিকার আমাদেরই ক্রতুকৃতমের

প্রাত্যহিক পদক্ষেপে

আমরা কোপাই গাঁথি বৃনি আর আমরাই জানি

নিজে নিজে এবং সবাই যদি ধানে মই

দিই নিজে নিজে কিম্বা সবাই বেশি কেউ কম

সদস্য তার নিজের সবার কম কেউ বেশি

আমাদের ইতিহাস মুহূর্তে মুহূর্তে গোপে

তরঙ্গিত আয়ু তার জীবনে মৃত্যুতে

আমাদের জীবিকায় জীবনযাত্রায় দেহমনের বিস্থ্যাসে

কর্মে অপকর্মে' কর্মহীনতায়—কিছুটা উদ্ভূত সন্দেহ

এক পাত্র জল জ'মে যেমন বরফ পাত্রটি ফাটায়

এবারে উঠেছে হাওয়া, ধোঁয়া নেই, দোলা দেবে চাঁদ

চৈবের সন্ধ্যায় হাওয়ায় হাওয়ায়

নাকি কোনো দোলাই দেয় না সে ?

পূর্ণিমার চাঁদ বটে, বাঁধ ভেঙে তবু কি সে হাসে

প্রকৃতি কি অপ্রাকৃত মৃত্যায়

হাসবে কি একাই নিষাদ ?

নির্বা'ক নিমেঘহীন সন্ধ্যা পূর্ণ চাঁদের মায়ায়

হেমন্ত বিবাদ এ কি বসন্তে এনেছে ?

তবু সন্ধ্যা চৈব সন্ধ্যা সমুদ্রের বাতাবত

দক্ষ দিনে মৃত্যুর শহরে

তবুও পূর্ণিমা আসে পথে ছাদে প্রহৃৎ কায়ায়

ভূবিদ্যে দিনের ছায়া কুট হ্রাঁবহ

ভেঙে দিয়ে অন্ধ বিসম্বাদ

উষাদের ব্যবসায়

চূর্ণ করে গুয়ু দানবিক হিংস্র কণ্ঠ

হয়তো বা শুনিমিকো হাসি

তোমার, পূর্ণিমা, তবু আমি শুধু খুঁজিনি বিবাদ

সোনালি চাঁদের এই নীল নির্বিকার আলোর বহুয়

বরফ শুনেছি দেশে দেশে লক্ষ্মীমন্ত সচ্ছল স্রুঠাম

গ্রামে গ্রামে শহর শহরে, বিস্তৃত শাস্তির বর্ষ।  
 দেখেছি সবাই যেন ভাসি  
 ছলি যেন জ্যোৎস্নার সমুদ্রের ঢেউয়ে ঢেউয়ে, নদী কিম্বা  
 আলোর ঝন ঝনি  
 আকাশের সমতলে মৃত্যুও যেখানে পুত্র ও কন্যায়  
 সম্পূর্ণ বার্থক্যে স্থির মানবিক যেখানে বাঁচাই আর  
 বাঁচানোই স্বাভাবিক।

হয়তো বা যন্ত্রণাই সার  
 দেখে যেতে হবে আজ ঠেকে শিখে  
 সস্তার অক্ষরে লিখে লিখে  
 অত্যাচারে অনাচারে উদ্ভ্রান্ত উন্মাদ এই বর্তমান  
 নিজে নিজে এবং সবার কৃতকর্মে শুনে যেতে হবে  
 কুরুক্ষেত্রে ভীম যেন কিম্বা সেই বিরাট প্রাসাদে  
 অজ্ঞাতবাসের বীর বৃহন্নলা অজুনের গান

কিম্বা যেন ফাল্গুন চৈত্রের প্রস্তুতির  
 পাতাঝরা নতুন পাতার আঁকশিতে অঙ্কুরে  
 শিরায় শিরায় শিকড়ের প্রচ্ছন্ন উৎসবে  
 অধরা অথচ তীব্র প্রাণের স্তব্ধতা  
 অনিবার্য যতির স্তব্ধতা  
 শ্রুতির আক্ষেপস্পন্দে  
 কবিতার ছন্দের মতন  
 কিম্বা যেন উত্তোলিত পদক্ষেপে  
 যখন সামনে দেখি সেতুর ফাটলে  
 অতলের প্রত্যথান এবং আহ্বান

কিম্বা বুঝি মোহানার গান  
 জগলীর নিস্তরঙ্গ সঞ্চয়ী মধ্যাহ্নে  
 পিছনে অনেক স্মৃতি বহুশ্রোত  
 রূপনারায়নের  
 দামোদর কাঁসাই হলদি রত্নলপুরের  
 দূরের মাংলা মাথাভাঙা আরো দূরে পদ্মার বানের।

অথচ নিঃশ্রোত মনে হয় একা কর্মহীন  
 প্রতিবেশী নেই  
 থাকলেও নিঃসঙ্গ সে কারণ সর্বদা  
 পরধর্ম ভয়াবহ ভাঁটায় জোয়ার  
 আন্দোলন সন্ত্রাসে নিঃশেষ  
 তাই প্রতীক্ষায় স্তব্ধ কিন্তু সমুত্ত  
 অন্ধকার প্রেক্ষাগৃহে খরদীপ্ত নৃত্যক্ষেপে বোল ছড়াবার  
 আগের মিনিটে আভঙ্গ আতত  
 বাল্যস্মরণী কিম্বা রুদ্রিণী দেবীর মতো—  
 আসন্নসম্ভবা অস্তুমুখী জননীর মতো  
 বৈশাখীর বৃষ্টির আগের স্তব্ধতায় সতর্ক গম্ভীর—  
 বলা যায় জ্যাবন্ধ ধনুর মতো  
 কিম্বা যেন বন্যা ধরে তাতার সওয়ার একাগ্র সংহত  
 পামীরে আরালে কিম্বা বুঝি কৃষ্ণ কাশ্যপ সাগরে  
 তারপর লাগে দোলা লাগে দোলা  
 খরশর শ্রোত  
 কল্লোলে মুখর  
 সমুদ্রে সমুদ্রে ওঠে তালে তালে  
 সমুদ্রে নদীতে নীল মহাসমুদ্রের কায়ায় হাসিতে

সাগরউষিতা সেই অধিষ্ঠাত্রী সুন্দরীর আবিষ্কৃত আভাসে  
উর্মিল জোয়ার

একাকার মুহূর্তে তখন চূড়ায়িত ক্ষণে সাম্প্রতিক  
অতীত ও আগামীর গান  
প্রাত্যহিক প্রাত্যহিক  
পলিতে উর্বর দিকে দিকে মানসে শরীরে  
জীবনে জীবন।

তোমার স্রোতের বৃষ্টি শেষ নেই, জোয়ার ভাঁটায়  
এদেশে ওদেশে নিত্য উর্মিল কল্লোলে  
পাড় গাড়ে পাড় ভেঙে মিছিলে জাঠায়  
মরীয়া বজ্রার যুদ্ধে কখনও বা ফল্গু বা পঞ্চলে  
কখনও নিভৃত মৌন বাগানের আশ্রয় প্রসাদে  
বিলাও বেগের আভা,  
আমি দূরে কখনও বা কাছে পালে পালে কখনও বা হালে  
তোমার স্রোতের সহযাত্রী চলি ভোলো তুমি পাছে  
তাই চলি সর্বদাই,  
যদি তুমি যান অবসাদে  
ক্লাস্ত হও স্রোতস্থিনী, অকর্মণ্য দূরের নিব্বরে  
জীয়াই তোমাকে পল্লবিত ছায়া বিছাই হৃদয়ে,  
তোমাতেই বাঁচি প্রিয়া  
তোমারই ঘাটের গাছে  
ফোটাই তোমারই ফুল ঘাটে ঘাটে বাগানে বাগানে।

জল দাও আমার শিকড়ে ॥

দু'জন

জীবনানন্দ দাশ

( ১৯৩৪-এর পাণ্ডুলিপি থেকে কিছু পরিবর্তিত )

‘আমাকে খোঁজো না তুমি বহুদিন—কতদিন আমিও তোমাকে  
খুঁজি নাকো ;—এক নক্ষত্রের নিচে তবু—একই আলো  
পৃথিবীর পারে

আমরা দুজনে আছি ; পৃথিবীর পুরোনো পথের রেখা হয়ে যায় ক্ষয়,  
প্রেম ধীরে মুছে যায়, নক্ষত্রেরও একদিন ম’রে যেতে হয়,  
হয় না কি ?’—বলে সে তাকালো তার সঙ্গিনীর দিকে ;  
আজ এই বিকেলের মাঠ সূর্য সহধর্মী অজ্ঞান কার্তিকে  
প্রাণ তার ভ’রে গেছে।

দুজনে আজকে তারা চিরস্থায়ী পৃথিবী ও আকাশের পাশে  
আবার প্রথম এলো—মনে হয়—যেন কিছু চেয়ে—কিছু  
একান্ত বিশ্বাসে।

লালচে হলদে পাতা অনুষ্ণে জাম বট অশ্বথের শাখার ভিতরে  
অন্ধকারে ন’ড়ে-চ’ড়ে ঘাসের উপর ঝ’রে পড়ে ;  
তারপর সান্দ্রনায় থাকে চিরকাল।

যেখানে আকাশে খুব নীরবতা, শান্তি খুব আছে,  
হৃদয়ে প্রেমের গল্প শেষ হ’লে ক্রমে-ক্রমে যেখানে মানুষ  
আশ্বাস খুঁজেছে এসে সময়ের দায়ভাগী নক্ষত্রের কাছে :  
সেই ব্যাপ্ত প্রান্তরে দুজন ;—চারিদিকে বাউ আম নিম নাগেশ্বরে  
হেমন্ত আসিয়া গেছে ;—চিলের সোনালি ডানা হয়েছে খয়েরি ;  
ঘুঘুর পালক যেন ঝ’রে গেছে—শালিকের নেই আর দেয়ি,

হৃদয় কঠিন ঠাণ্ডা উঁচু করে ঘুমোবে সে শিশিরের জলে ;  
ঝরছে মরিছে সব এইখানে—বিদায় নিতেছে ব্যাপ্ত নিয়মের ফলে ।

নারী তার সঙ্গীকে : ‘গৃহিণীর পুরোনো পথের রেখা হয়ে যায় ক্ষয়,  
জ্ঞান আমি ;—তারপর আমাদের হৃৎস্পন্দ হৃদয়  
কী নিয়ে থাকিবে বল ;—একদিন হৃদয়ে আঘাত চের দিয়েছে চেতনা,  
তারপর ঝরে গেছে ; আজ তবু মনে হয় যদি ঝরিত না  
হৃদয়ে প্রেমের শীর্ষ আমাদের,—প্রেমের অপূর্ব শিশু আরক্ত বাসনা  
ফুরোতো না যদি, আহা, আমাদের হৃদয়ের থেকে—’  
এই বলে ত্রিয়মাণ আঁচলের সব স্বভা দিয়ে মুখ ঢেকে  
উদ্বেল কাশের ভিড়ে দাঁড়িয়ে রছিল হাঁটুভর ।  
হৃদয় রঙের শাড়ি, চোরকাঁটা বিঁধে আছে, এলোমেলো অজ্ঞানের খড়  
চারিদিকে শূন্য থেকে ভেসে এসে ছুঁয়ে ছেনে যেতেছে শরীর ;  
চুলের উপরে তার কুয়াশা রেখেছে হাত, ঝরছে শিশির ;—

প্রেমিকের মনে হ’লো : ‘এই নারী—অপরূপ,—খুঁজে পাবে  
নক্ষত্রের তীর ;  
যেখানে রবে না আমি, রবে না মাধুরী এই, রবে না হতাশা,  
কুয়াশা রবে না আর,—জনিতা বাসনা নিজে—বাসনার  
মত ভালোবাসা  
খুঁজে নেবে অমৃতের হরিণীর ভিড় থেকে ঈঙ্গিতেরে তার ।’

## দাঁওতাল গান

১

নীল পাহাড়, সবুজ পুকুর, ঠাণ্ডা জল,  
ময়লা করিপনে কোয়েল পাখি,  
বন্ধ আমার দ্বান করবে ।

২

জোড়া ঘূর্ণী ছুটে এলো উপরদেশ থেকে,  
বারাঙ্গায় তুলোর পাঁজ তৈরি—  
খবরদার ! ঘূর্ণী হাওয়া উড়িয়ে নেবে ।

৩

ঢোল বাজে নাগড় বাজে রাস্তায় ।  
আমি জলের বাটে ছিলাম,  
সেই স্তনে মজে গেলাম,  
জলের ঘড়া তুলতে গিরে ফাটল ।

৪

আমি নদীর এপারে,  
তুমি নদীর ওপারে,  
আমায় ভালোবাসো তো ?  
আমায় ভালোবাসো তো ?  
দাঁও না তবে কদম ফুল গায় ছুঁড়ে ।

৫

পথে-পথে চলেছি,  
মধ্যপথে বাবলা গাছ ।  
গাছে বসে স্বর্ণপুঁপি পড়লো,  
পুরোনো বন্ধুকে পাখো ।

৬

মতদিন বিয়ে হয়নি  
মায়া রাত নেচেই কাটতো,



এখন ছেলেপুলে নিয়ে  
কত রাত চিন্তায় ভোর।

৭

শ্রাবণ মাসে শুকনো হোলো  
ভাদ্র মাসে বর্ষা এলো।  
হায় রে হায় স্বর্ষ চিত্তা!

ধান মরল

মাহুঘের প্রাণ মরল।

৮

বেটা হইল বড়,  
ভার বোঁ আশবে ঘরে।  
আমার মন এত খারাপ কেন ?

৯

ছোটো ছিলাম যখন বিয়ে দিলে।  
বাবা আমায় দেখবে এসো একবার,  
কুদনা = কত চিলে হ'লো।

১০

এত বড় পৃথিবী  
জলছে দুটি তারা।  
জনম কালেও দুটি তারা হে ভগবান !  
মরণ কালেও দুটি তারা হে ভগবান !

১১

কাকী কাকী কাকীমা  
একটু ছায়া একটু রোদ।  
ধাকতো যদি আমার মা ;  
জোড়া পাকি চ'ড়ে যেতাম  
চামর সৌন্দল্যে ছলতো।

১২

ছোটো ছিলাম যখন বিয়ে দিলে বাবা।  
আমার জনম ঘরের দিশা নাই।  
পথের ধারে জেলের ছেলে,  
জেলের ছেলে বাৎসে দিলে  
আমার জনম ঘরের পথ ॥

('হিরো' পরবের গান)

১

বুটি পড়ে জিপির জিপির  
বুটি পড়ে হেথায় হোথায়  
মাছ চলেছে বিরিং বিরিং।  
কাকী চল মাছ ধরি যাই কুখেতে,  
কাকী চল মাছ ধরি যাই জিজিরে।

মাছের ঝাঁক চললো

চললো নদী বেয়ে,

কুখেড ভাঙলো, জিজির ভাঙলো

মাছের ঝাঁক কোথায় গেলো ভেসে।

২

কোথাও কাঠ নেই

কোথাও পাতা নেই,

ঝোপঝড় সাক

বনজঙ্গল সাক।

এখন তবে মুন বেচো

তামাক পাতা ভাও বেচো,

গিরিপির বাজার কত চুর ?

৩

একটা সেলেট

একটু কাগজ,

নামটি লিখে রাখো।

তোমার আঙিনায়

আমার আঙিনায়

বেজুর মাথা নাড়ে হুলছে পঁপে গাছ।

ফল নিয়ে বেচবে। ভাষা দিয়ে কিনবে,

পাতা ভুলে বেচবে। সোনা দিয়ে কিনবে।

ঝড় উঠলো পূবে রে,

ঝড় উঠলো পশ্চিমে,

আমার পঁপে গাছ রে, তোমার গাছও প'ড়ে গেলো।

৪

হিরিজিরি পুকুরে সিরিসিরি দিঘিতে

সিরিসিরি দিঘিতে হিরিজিরি পুকুরে

কী সুন্দর ফুল রে, কী সুন্দর ফুল।

সেই ফুল ভুলতে

সেই ফুল নিতে রে

দুই রান্ধস ব'সে আছে

সেই ফুলে হাত রেখে রে।

ভুললো তারা ফুল রে

ছিঁড়লো তারা ফুল রে,

কিন্তু ফুল স্ব'রে গেলো

রোদুরে শুকিয়ে গেলো।

'ছো'দের গান

( মাঝে পঁরবের গান )

১

বনের ভিত্তর অড়র গাছ

( হাওয়ায় দোলে )

লেসেকেন লেসেকেন

হাওয়া এলো পূব থেকে

হাওয়া এলো পশ্চিমের

দোলে গাছ দোলে পাতা হাওয়ায় দোলে

লেসেকেন লেসেকেন ॥

২

ইশ কী গরম, উঃ কী রোদুর,

তবু আম গাছে পাতা গজায় না তো।

নতুন বৌ আসে, নতুন বৌ এলো,

তবু আম গাছে পাতা গজায় না তো।

৩

চাইবাসা থেকে পিতলের বাঁশি

কলকাতা থেকে সোনার বেহালা,

বলো জুমি রাখবে কথা রাখবে তো ?

ও, বাঁশি ভাঙবে ?

বেহালা ফেলে দেবে ?

তবে তোমায় উশ্টে ফেল বড় ভাঙবো।

৪

দুই বনের মাঝে রে

সিম সিক্রং ফলেছে,

বেঁধাঘেঁষি কত রে  
সিম সিরুং ফলেছে।  
যাঃ! এ তো সিরুং না,  
সিম না, সিরুং না,  
মেয়ের দল দাঁড়িয়ে আছে রে।

৫

মোড়লের আঙিনায়  
মোড়লের আঙিনায়  
কীসার বাসন বনঝনিয়ে বাজে।  
না, এ তো বাসন না,  
কক্খনো বাসন না,  
মোড়ল তার মাইনে গুনছে বসে।

৬

বনের ধারে অড়র গাছ  
বনের ভিতর অড়র গাছ  
রোদুুরে নেতিয়ে পড়েছে।  
না রে না রোদেও না,  
না রে না বনেও না,  
আমার পরান অড়র গাছ  
কিসের টানে নেতিয়ে পড়েছে।

৭

ও হাইলগেলের \* সুন্দরী  
তোমায় দেখে পরান আমার কী আনন্দে নাচে।  
তুমি খিলখিলিয়ে হাসো,

\* গ্রামের নাম

সে-সুর আমার কানে আসে  
তোমায় আমি ছিনিয়ে নিয়ে যাবো।

উঁচু নিচু রাস্তা বেয়ে চলে।  
মাঝে-মাঝে ডাইনে-বীয়ে চেরে,  
তোমার চলা বেথে-বেথে  
পরান আমার কী আনন্দে নাচে।

কলাপাতার সবুজ তোমার গায়ে।  
তোমার মনও মজেছে তো, মজেছে তো?  
একটু ভবে সবুর করো আমার তরে।

লক্ষা যেমন টকটকে লাল, টুকটুকে লাল,  
সিংবেংখা কী সুন্দরই না বানিয়েছেন  
কী সুন্দরই বানিয়েছেন তোমায়!

বাচ্চা জন্তু চলেছে, কখনো পিছন পানে চায়,  
হিংস্র জন্তু তার পিছনে ধায় ॥

ও সুন্দরী সোনার মেয়ে,  
সখির দলে তোমার খেলা  
মাছের খেলা গঙ্গানদীর জলে।

রক্তরাঙা গোলাপফুল  
বাতাস তার গন্ধ বয়ে আনে  
তোমার মাথায় সে-ফুল দেবো গুঁজে ॥

ও স্মরণী, মাইলগেলের সোনার মেয়ে,  
একটিবার আমার কিছু বলো,  
তবে তো প্রাণ নাচে আমার আনন্দে।

তুমি নাটালফুলের মতো শাদা  
জ্বলছে তুমি পূর্ণিমার চাঁদে ॥

তুমি শালুক ফুল,  
তোমার হাসি বাঙালি মেয়ের মতো ॥

ও স্মরণী, ওগো আমার সোনামতী  
আমায় যদি ভালোবেসেই থাকে  
তবে চলে। একসঙ্গেই চলে।

### তুমিজন্মের গান

১

বাগানবাড়ির ভিতরে  
ভিত্তির প্রান করে বাবা!  
গায়ে লাল মাটি মাখে  
ভিত্তির প্রান করে!

২

খেজুর খেজুর!  
হিলে না হোলে না দাদা  
খেজুর খেজুর!  
গিরে পড়িল  
খেজুর খেজুর!  
বানে ভাসিল  
খেজুর খেজুর!

স্মরণীৎ সিংহ

### যাকে চাই

মনীন্দ্র রায়

যাকে চাই সে তো এক নয়, খুঁজি তাই নিশিদিন;  
মিশি মেলাহাটে, কপাটের খিলতোলা ঘরে ঘরে;  
চেটেয়ে চেটেয়ে তার গানে স্বর বেলাবাপুকায় গীন,  
রেখার চুড়ার মিনারে মিনারে নীলমুষ্টি ধরে।

পিঙ্গিমের শিশে জালের কালিমা, ছায়া কালো কালো,  
ছায়া ঘোমটার টানে রাঙে মন, রঙ কিকিমিকি  
সন্ধ্যার লালে নীল ঝিলমিলি পাতায় মিলালো,  
আনত হিজলে ভেজা হাওয়া কাঁপে, খুশি ভরে দীঘি  
শিহরে সবুজ চেটেয়ে, পাড়ে পাড়ে ঘাসের শিথানে  
ঘুমপাড়ানিয়া দোলা লাগে, খোলে রূপশীর চুল  
হঠাৎ প্রেমের জোয়ারে, কোমরে বাহুর খিলানে  
বুকে মুখে টানাচোখে দৃশিকের কালের পুতুল।

যাকে চাই, শত উর্বশী পলাতকার বেধে  
অখিত ঝাঁচলে স্মৃতি তার সারা বাংলাদেশে ॥

## প্রথম আঘাত

## বেদনাদাস পাঠক

অবশেষে বৃষ্টি এলো। যখন ক্রান্ত মনের  
ছকুল ছাপিয়ে কান্নার ঢেউ, থরোথরো দিন—  
রাত্রির ব্যথা ছঃসহ। মেঘ পলাতক; আর  
রুদ্ধ রক্তমা দিগন্তে। দূর পলাশবনের  
পাতায় হলুদ বেদনার ছাপ লাগলো। মলিন  
সন্ধ্যার চোখ কাকুতি-করণ। বৃষ্টির ছাঁট  
তখনই লাগলো জানালায়। এলো প্রথম আঘাত।

শার্সি ছলোছলো, পাগোল হাওয়ার  
দাপাদাপি আমার ঘরে, আর বরোবরো জল  
বাইরে। মনের অন্ধ গলিতে থামলো,  
কান্না থামলো। নামলো অন্ধকারে  
বুক জুড়ে এ কী সামান্য—যেন মমতার ঢল  
হিসেবের বাঁধ ভাঙলো। ময়লা পাটিগণিতে  
কাগজের নৌকো ভাসিয়ে হৃদয় সহসা ময়ূর।

## একুশ

## মুকুল ভট্টাচার্য

এবার গ্রীষ্ম একুশে পড়লো।  
হায়রে কোথাও নেই কোরক  
আমের-জামের। তাহোক, তাহোক,  
আমার গ্রীষ্ম একুশে পড়লো।  
যেদিকে তাকাই শুকনো পাতার  
বরা রাশি আর  
রুদ্ধ ধুলো।

তাহোক, তাহোক,  
আমার বৃন্তে গ্রীষ্মে কোরক :  
কোন পাখি কবে ফেলে গেছে তার টুকরো খড়।  
সেই খড় উড়ে আমার গ্রীষ্মে উঠলো ঝড় !  
কিছু নেই আর কিছু নেই—  
হায়রে একুশ পেয়েছো এই  
পোড়া পৃথিবীর শুকনো ধুলোর রুদ্ধ ঝড়।  
ফেলে-যাওয়া যতো টুকরো খড় !

তাহোক, তাহোক,  
আমার বৃন্তে একুশে অবাক এ কার কোরক ?  
চেয়ে-চেয়ে দেখি কৃষ্ণচূড়ার  
উল্লাস আর  
তোমার হাতের টুকরো খড়।  
সেই খড় উড়ে আমার গ্রীষ্মে উঠলো ঝড়।  
হাওয়ার টান,  
রৌদ্র জ্বালায় প্রথর গান।  
কবে ফেলে গেছো তোমার হাতের টুকরো খড়,  
গ্রীষ্ম আমার একুশে এবার উঠলো ঝড়।

## অখ্যাত

## দেবব্রত সেনগুপ্ত

আলোর বিশ্বাস নিয়ে  
 একবিন্দু সত্য কাঁপে  
 আকাশের অন্ধকারে জেলের নৌকায় ;  
 ভেসে যায়—  
 দিনের বিশ্বাস নিয়ে রাত্রির আধারে  
 দূরে চ'লে যায় ।  
 মাঝে-মাঝে কেঁপে-কেঁপে কাছে ভেসে আসে  
 মুহূর্তের অবকাশে চোখে দেখা যায় ।  
 আবছায়া লাল আলো জেলেদের গায় ।  
 মাঝ-দরিয়ায় দোলে  
 খ্যাতির আলোকে ভোলে  
 জাহাজের বিশাল ভুগোল ।  
 আলো ভাঙে ছায়া হ'য়ে, চিকমিক জল  
 ছলছল  
 জোয়ারের উদ্যম চেউ  
 জাহাজের পায়ে বৃথা মাথা কুটে মরে,  
 খ্যাতির আলোকে জলে সফরী জাহাজ,  
 অবুঝ জোয়ারে এ কী বিনীত উচ্ছ্বাস ।  
 সেই ফাঁকে টেউয়ে-টেউয়ে নাচে  
 ঝংসাহসিক জেলে ডিঙি  
 সতোর শপথ নিয়ে,  
 বিন্দু-বিন্দু আলো নাচে ছলে-ছলে  
 ব্যঙ্গ করে নদীর জোয়ারে ।

তবু আশা বেয়ে চলে ওরা খ্যাতিহীন—  
 ছাড়ায় নদীর সীমা ।  
 মুছে যায় অবিরল জলে  
 এ-তুচ্ছ প্রভেদ,  
 দূরের পারের ঘরে মাটির শ্রদীপ জ্বলে  
 প্রাণের সংকেত ।

## চিঠি

জয়ন্তী সিংহ

উতলা বাতাস এলোমেলো,  
 হে প্রিয়তম,  
 আজ সন্ধ্যায় লিখবো কি চিঠি  
 গভীরতম !  
 স্বর্ণচাঁপার গন্ধে মাতাল স্মৃতি  
 (মনের পাথরে চাপা-পড়া যত কঙ্কাল)  
 এলোমেলো হাসে কী যে কথা কয় চাঁদের আলোয়  
 পৃথিবী আজকে কাঁপছে দেখি  
 তারও কি লাগলো নেশা !  
 রাতের পাখির অঝোর প্রলাপ ঝরছে দূরে  
 তারও বৃষ্টি এই পেশা ।  
 আমিও হঠাৎ খাপছাড়া চিঠি  
 (মূল অর্থটি তুমি বুঝে নিয়ে, প্রিয়)  
 লিখতে বসেছি পতন ঘটছে ছন্দে  
 সব কথা আজ ঝিমঝিম করে  
 স্বর্ণচাঁপার গন্ধে ।  
 আজ সন্ধ্যায় ঝাপসা স্মৃতির  
 জের টেনে নিয়ে লিখবো কি ফের স্মনিপুণ কৌশলে !  
 একদিন রাতে লেকে  
 (হয়তো বছর দশেক আগে)  
 আবোলতাবোল কত কী যে বলেছিলে  
 রাকার আলোয় চোখে চোখ রেখেছিলে  
 সময় কেটেছে প্রলাপ ব'কে

ভবিষ্যতের নস্রা এঁকে

সেই রাত্রির লেকে !

পূর্ণ চাঁদের মদির আলোয়

ঘাসের শিশিরে শাদায় কালোয়

মনের জ্বলির বিচিত্র টানে

আলপনা একেছিলে—

সেই কথা ভেবে লিখবো কি চিঠি

বলো তো প্রিয়,

পাঠাবো এ-চিঠি যার কাছে, তার

মন কি সেখানে বসে আছে আর—

মূল অর্থটি না যদি বোঝো তো

ফেরৎ দিয়ে।

## তোমার চোখ

## অরবিন্দ গুহ

হাওয়ায়-হাওয়ায় কতো গান আমি গেয়েছি হেঁকে।  
আষাঢ়ের জল জানালার 'পরে ব্যরেছে বৌকে,—  
আঁকাবাঁকা জল মনের এ-কথা অন্ধকারে,

মেঘ জ'মে ওঠে আকাশে ও ঘাসে, মাঠের পারে।  
হাজার চোখের কথা শুনায়েছে পথের লোকে :  
তোমার চোখের মতো ছুটি চোখ পড়েনি-চোখে।

মালতীলতায় ছপুর ঘুমায় হাওয়ার সুরে ;  
হাতে হাত ধরে গোল হ'য়ে যারা নেচেছে ঘুরে  
ঝাঁ-ঝাঁ রোদ্দুরে অনেক দূরের ছায়ার গানে ;

কাজল চোখের সে-ছায়া যে কার কেউ কী জানে।  
হাজার চোখের গল্প বলেছে হাজার লোকে :  
তোমার চোখের মতো কালো চোখ দেখিনি চোখে।

রঙিন বিহুক সমুদ্রের কিনারে আঁকা,  
চেউয়ের কৌটায় শামুকের রং আধেক ঢাকা।  
স্বপ্নে তোমার কান্নায় ঘুম ভেঙেছে কতো :

তোমার কান্না আমার বিহুকে চেউয়ের মতো  
হাজার চোখের কথা ব'লে গেছে হাজার লোকে :  
তোমার চোখের মতো ছুটি চোখ পড়েনি চোখে।

## টবের গাছ

## সরোজ বন্দ্যোপাধ্যায়

এই সিঁড়ি দিয়ে আমি কতবার উঠেছি নেমেছি।  
তোমার ঘোরালো সিঁড়ি স্তব্ধতায় ভরা,  
আমার যত না আনাগোনা  
কোনোদিন প্রতিধ্বনি তোলেনি সেখানে।  
সিঁড়ির শেষের ধাপে টবের মাটিতে  
কী এক সৌখীন চারাগাছ  
এ-উদাস নিয়মের সাক্ষী হ'য়ে আছে।

এই গাছ এতদিন দেখেও দেখিনি।  
তোমার মনের ছাই ব'য়ে নিয়ে চ'লে যেতে-যেতে  
এ-গাছের সামনে সেদিন  
অস্থান ফিরে তাকালাম।  
অপুষ্পক গাছ  
বোবা পত্রপুঞ্জ তার কোনোদিন শিশির ব্যরে না,  
অরণ্যমর্দর থেকে নির্বাসিত এই এক দরিদ্র জীবন।  
এই গাছ ছায়া দিতে জানবে না,  
অপ্রতিভ ফেরৎ পাঠাবে  
দক্ষিণে হাওয়ায়।  
জানাবে না নিমন্ত্রণ,  
কিংবা অভ্যর্থনা,  
মৌমাছির ফিরে যাবে,  
ব্যর্থ হবে স্বতুর বাহার।  
কত ব্যর্থ তার আয়ু



কোনোদিন বুঝে না নিজে ।

আমিও বুঝি না

তোমার সিঁড়িতে এই চারাগাছ কেন যে রেখেছো,—

বুঝেও বুঝি না একদিনে ।

ব্যর্থতা

সোমনাথ বন্দ্যোপাধ্যায়

আকাশের বহু স্বপ্ন  
পৃথিবীর অম্লবর্ষ মাঠে  
বুনে বুনে ব্যর্থ হলে পর  
নামে পাখিদের  
ঘুমোবার রাত ।  
ধূসর ছায়ায় বোজে  
নীড়ের কপাট ।

সে-ব্যর্থতা ভেসে আসে  
আমাদের ঘরে,  
নামে অন্ধকার ।  
চেতনার অতন্দ্র গভীরে  
স্বপ্নের অঙ্গুর তোলে  
ক্ষীণ আত্ননাদ ।

চুপ করে বাঁসে থাকি,  
ঘিরে আসে গভীর বিবাদ ।  
তবু দূরে আলোর আকাশ,  
তবু দূরে উজ্জ্বল আকাশ,  
পাখিদের সাথে এই  
আমাদের একটু তফাৎ ।

## তিনটি কবিতা

বটরুক্ষ দে

কথা

ছোটো-ছোটো কথা । টুকরো টেউয়ের মতো  
হালকা দেখতে ।  
তবু কতো ভারি ।  
কথা যে হৃদয় তাই  
এতো তার দাম,  
তাই তাকে নিয়ে আজো অস্থির চলছে নিলাম !

নাম

এই নদী, এই ঢেউ কতোবার ছুঁয়েছে তোমায় !  
স্বচ্ছায় দিয়েছ ছেড়ে তোমার তুমি-কে তার হাতে ।  
বালির শরীরে আঁকা লোনা কতো নাম,  
তার দাম  
দিয়েছ অনেক বার তুমি ।  
আমি শুধু তার নীচে আরো ছ'টি বর্ষ বসলাম ।

স্পর্শ

বেতের লতার মতো থরোথরো শ্রোত-কাঁপা মন  
সকালে ফুলের মতো ছুঁয়েছি যখন,  
তখনই হাওয়ার স্বরে পাপড়িতে পাতায়  
হৃদয় শিশির হ'য়ে আলগোছে যায় ব'রে যায় ।

## শান্তিনিকেতনে ছুটি

নরেশ গুহ

দূরে এসে ভয়ে থাকি : সে হয়তো এসে বসে আছে ।  
হয়তো পায়নি ডেকে, একা ঘরে জানালার কাছে  
বৃষ্টির বর্ণনা শুনে ভুলে গেছে এটা কোন সাল,  
ভুলে গেছে জীবনের দরিরজ ধীর আঁর জাল  
জোড়া দিতে পারবে না । যদি দেয় তবু ক্ষীণ হাতে  
সেই ধূত মাছটাকে পারবে না ডাঙায় ওঠাতে ।  
পারলেও অভিজ্ঞান সে-অসুখী হয়তো বা ফিরে  
পাবে না পাবে না তার শীতল পিচ্ছিল পেট চিরে ।  
যদি পায় ?

যদি তার এতকাল পরে মনে হয়—

—দেরি হোক, যায়নি সময় ?

শান্তিনিকেতনে বৃষ্টি : ছুটি শেষ । ভিজ়ে আলতা-লাল  
শূন্য পথ । ডাকঘরে বিয়ুখ কাউন্টার চুপ । কাল  
হয়তো রোদ্দর হবে, শুকোবে খোয়াই, ভিজে ঘাস ।  
লোহার গরাদ ঘেরা আত্রকুঞ্জে কবিতার ক্লাস  
কাল থেকে ফের । ঘুমে ফোলা চোখ, ভাঙা-ভাঙা গলা  
কবে সে মন্থর পায়ে শাতাঝরা ছাতিম তলায়  
একা এসে ঘুরে গেছে ?

ঘন্টা শুনে হঠাৎ কখন

অকারণে দিন গেল : ছায়াচ্ছন্ন শান্তিনিকেতন ।

কলকাতায় ফিরে যদি—যদি আজ বিকেলের ডাকে  
তার কোনো চিঠি পাই ? যদি সে নিজেই এসে থাকে ?

## আজকের দিনে বীরবল

অরুণকুমার সরকার

মেজাজটা মজলিসী হলেও, প্রথম চৌধুরীর স্বভাবটা ছিল যুক্তিবাদী তর্কিকের। সান্নে একজন প্রতিবাদী খাড়া না-থাকলে, লেখায় তিনি তেমন জুত পেতেন না! শুধু-যে তাঁর প্রবন্ধের বেলাতেই একথা খাটে, তা নয়। তাঁর রচিত ছোটোগল্পগুলিও মূলত কথোপকথন-নির্ভর, তর্কবিতর্কের ঠাসবৃহ্নিতে সময়-সময় আধা-প্রাবন্ধিক।

আত্মস্তিক যুক্তিনিষ্ঠা আবেগের স্বতঃস্ফূর্তিকে প্রতিহত করে। সুতরাং বুদ্ধিবৃত্তিই-যে প্রথম চৌধুরীর মনোজগতে সর্বসর্বা হবে, তা তো জানা কথা। কিন্তু এর ফলেই কিনা জানি না, সংলাপসৃষ্টিতে অসামান্য কুশলী হ'য়েও তিনি নাটকরচনার প্রবৃত্ত হননি; কাব্যকলার ক্ষেত্রে তাঁকে আটোঁসাঁটো চতুর্দশদীর আশ্রয় নিতে হয়েছিল; আর, সত্যি কথা বলতে, নিভুল ব্যাকরণ এবং বিশ্ময়কর চাতুর্ঘ্য সত্ত্বেও, হার্দ্য কবিতা একটি-দুটির বেশি তিনি লিখে উঠতে পারেননি; এবং, সম্ভবত গল্পেও নয়, আত্মপ্রকাশের অবলম্বন হিসেবে প্রবন্ধেই তিনি অপেক্ষাকৃত স্বাচ্ছন্দ্য অনুভব করেছিলেন।

‘অপেক্ষাকৃত’,—কেননা, প্রাণ বা চায়, আমার মনে হয়, প্রথম চৌধুরী তা কদাচিৎ লিখে ওঁরবার ফুরসত পেয়েছেন। বস্তুত, নিজের জালেই তিনি জড়িয়ে পড়েছিলেন। তাঁর প্রাথমিক সংকলন ছিল পারতপক্ষে সংস্কৃত শব্দের ঘারস্থ না-হয়ে, কথ্য ভাষা আর সংলাপী ভঙ্গিমায় সর্বজনবোধ্য সাহিত্য রচনা করা। কিন্তু কলমে হাত দিয়েই তিনি বৃষতে পেরেছিলেন সাধারণ বাঙালী যে-ভাষায় বাক্যালাপ করে তা ছতুম পেঁচার বিস্তিখেউড় মাত্র: সে-ভাষায় হাটবাজার চলে,

বীরবলের হালধাতা: প্রথম চৌধুরী; বিশ্বভারতী। তিন টাকা

চিত্তা করা যায় না এবং ইতিপূর্বে কেউ ক'রেও যায়নি, কেননা মনন-ক্রিয়ার ব্যাপারটা প্রাক-ইংরেজ আমলে ব্রাহ্মণ পণ্ডিতদেরই একচেটে ছিল, এবং সংস্কৃতই ছিল তাঁদের তত্ত্বালোচনার অবলম্বন। সুতরাং সংকল্পসিদ্ধির প্রয়োজনে প্রথম চৌধুরীকে সম্পূর্ণ নূতন একটা রাস্তা তৈরি ক'রে নিতে হয়েছিল; এবং সেই নির্মাণকার্যের গুরুতর পরিশ্রমে তাঁর সাহিত্যিক স্বাস্থ্যেরও ক্ষতি হয়েছিল সন্দেহ নেই। কেননা, তাঁর গছ-যে বহু চেষ্টায় তৈরি-করা অভিনব বস্তু,—অত্যধিক অহংচেতনায় কখনো অতি-সপ্রতিভ, কখনো বা নববধুর মতো আড়ষ্ট,—এই অস্বস্তি-কর সত্যকে গোপন করার জন্ম প্রায়ই তাঁকে গলদঘর্ম হতে হয়েছে। তাই বীরবলী গড়ে, সাহস ক'রে বলেই ফেলি, স্রোত নেই। মনে হয় ভারি বৃট্জুতো প'রে একদল সৈনিক কুচকাওয়াজ করছে, তাদের প্রতিটি পদক্ষেপ মাপাজোখা, একঘেয়ে এবং মন্থর। রবীন্দ্রনাথ এবং বীরবলের রচনা একসঙ্গে পড়লে আমার বক্তব্যটা, আশা করি, স্পষ্টতর হবে:

‘সাহিত্য শিক্কার ভার নেয় না, কেননা মনোজগতে শিক্ষকের কাজ হচ্ছে কবির কাজের ঠিক উলটো। কবির কাজ হচ্ছে কাব্য সৃষ্টি করা, আর শিক্ষকের কাজ হচ্ছে প্রথমে তা বধ করা, তার পরে তার শব্দচ্ছেদ করা—এবং ঐ উপায়ে তার তত্ত্ব আবিষ্কার করা ও প্রচার করা। এইসব কারণে নির্ভয়ে বলা যেতে পারে যে, কায় ও মনোরঞ্জন করাও সাহিত্যের কাজ নয়, কাউকে শিক্ষা দেওয়াও নয়। সাহিত্য ছেলের হাতের খেলনাও নয়, গুরুর হাতের বেতও নয়।’ (বীরবলের হালধাতা—১২৭ পৃঃ)

‘হচ্ছে’ এবং ‘করা’—এই দুটি ক্রিয়াপদের পৌনঃপুনিক ব্যবহার আজকাল আমাদের কানে সহ্য হওয়া সহজ নয়। অথচ ক্রিয়াপদের পুনরাবৃত্তিতে সর্বদাই-যে বাক্যের কাঠামো হতস্ত্রী হয়, এমন নয়। উদাহরণ হিসেবে প্রথম চৌধুরীর ‘রায়তের কথা’ নামক পুস্তকের জন্ম

রবীন্দ্রনাথ যে-ভূমিকা লিখেছিলেন, তা থেকে একটি অংশ উদ্ধার করছি :

‘আর দেশে যখন এই প্রগল্ভ বাগ্‌বাত্যা বায়ুমণ্ডলের উর্ধ্ব-স্তরে বিচিত্র বাঙ্গালীরা রচনায় নিযুক্ত, তখন দেশের যারা মাটির মানুষ, তারা সনাতন নিয়মে জন্মাচ্ছে, মরচে, চাষ করচে, কাপড় বুনচে, নিজের রক্তে মাংসে সব প্রকার খাপদ-মাছবের আহার জোগাচ্ছে, যে দেবতা তাদের ছোঁয়া লাগলে অশুচি হন, মন্দির প্রাঙ্গণের বাইরে সেই দেবতাকে ভূমিষ্ঠ হয়ে প্রণাম করচে, মাতৃভাষায় কঁাদচে, হাসচে, আর মাথার উপর অপমানের মুবলধারা নিয়ে কপালে করাঘাত করে বলচে, “অদৃষ্ট !”’

বাংলা শব্দের উচ্চারণে উচ্চাবচতা বা এ্যাকসেন্ট না থাকায় তা একান্তভাবেই বানানের গাঁটছড়ায় ঝাঁপা। এদিকে প্রাকৃত বাংলা শব্দকে তদ্বিতপ্রত্যয়ের অধীনে আনা এক প্রকার অসম্ভব বললেই চলে। এই অবস্থায় বাক্যের ছন্দলীলাকে অব্যাহত রাখার প্রয়োজনে বক্ষিমচন্দ্র যেমন প্রধানত ধ্বনিমুখর সংস্কৃত যুগ্মশব্দের আশ্রয় নিয়েছিলেন, প্রমথ চৌধুরী ভেমনি জোর দিয়েছিলেন প্রাকৃত বাংলার হসন্তবহুল ত্রিফোপদের উপর। রবীন্দ্রনাথের গল্প এই দুই রীতির আশ্চর্য সমন্বয়।

কিন্তু মনে রাখা দরকার বীরবলের অধিকাংশ রচনা আজ থেকে তিরিশ-চল্লিশ বছর আগে, ১৯১০ থেকে ১৯২০ খৃষ্টাব্দের মধ্যে লিখিত। ইতিপূর্বে কালীপ্রসন্ন সিংহের প্রভাবে বক্ষিমচন্দ্রের পরীক্ষা নিরীক্ষায় বিভাসাগরী গল্পের বহিরঙ্গে বেশ কিছু রদবদল ঘটে গেলেও, সেই সময়কার সাধুভাষা প্রকৃতপক্ষে বর্গচোরা ইংরিজি বাক্যের তর্জমা বই আর কিছুই ছিল না। বাংলা গল্প-বে বিধর্মী ইংরেজ পাজীদের সৃষ্টি, আঠেপুঠে সংস্কৃত শব্দের নামারলী জড়িয়ে এবং সংস্কৃত বৈয়াকরণকে তন্ত্রতাউসে বসিয়ে সেই কেছটা ঢেকে রাখবার চেষ্টা চলছিল। আর মজা এই যে, বিকল্পের অভাবে, এই দোঁআঁশলা বাক্যগঠন-

রীতিতেই সাধারণ বাঙালী পাঠকের কান অভ্যস্ত হয়ে গিয়েছিল। প্রমথ চৌধুরীই সর্বপ্রথম বাংলার খাঁটি বাকুবিশ্বাসরীতিকে তন্নিত্তভাবে, আলালী গ্রাম্যতা পরিহার করে, সাহিত্যিক অর্থে ব্যবহার করেছেন। যদিও সেই বাকুবিশ্বাসরীতির প্রচলন ছিল শহরের শিক্ষিত কয়েকজনের মধ্যেই, তবুও তার গড়নে বাঙালিয়ানার ছাপ অধিকতর সুস্পষ্ট বৈকি। বলা বাহুল্য, ত্রিফোপ এবং সর্বনামের পোষাক বদলেই প্রমথ চৌধুরী কান্ড হননি; সে-কাজ তো রানা-শ্যামাই করতে পারত। সরাসরি মৌখিক রীতির অনুসরণে বাক্যগঠন করে, গল্পে প্রবন্ধে বাংলার প্রচলিত বোলবুকনি, প্রবাদপ্রবচনকে মার্জিতভাবে প্রয়োগ করার কৃতিত্ব তাঁরই প্রাপ্য। তাছাড়া, বাংলার সুদূর কাব্য-কাহিনীর ঐতিহ্যে স্নান করলে নবজাত বাংলা গল্পের জন্ম-যে পুণ্ডিত হয়ে উঠবে, প্রমথ চৌধুরীই তা সর্বপ্রথমে আমাদের চোখে আঙুল দিয়ে দেখিয়ে দিলেন। তার ফলেই তো উপনিষদের দিক থেকে আমাদের ঘাড় ফিরল ঈশ্বর গুপ্তের গ্রাম্যতার দিকে নয়, আলালী অসভ্যতার দিকেও নয়, ভারতচন্দ্রের বৈদ্যের দিকে এবং শিক্ষিত গল্প তার যথার্থ কুলপঞ্জীর সন্ধান পেল।

আমার অনেক সময় মনে হয়েছে ভাবাসংস্কারকাৰ্বী যদি প্রমথ চৌধুরীর অদ্বিতীয় লক্ষ্য হ’ত, তাহলে তিনি তাঁর গল্পকে নিয়ে অনায়াসেই ভেলকি খেলাতে পারতেন যার প্রমাণ পাওয়া যায় তাঁর ব্যক্তিগত চিঠিপত্রে। কিন্তু বীরবল, আগেই বলেছি, মস্তিষ্কপ্রধান ব্যক্তি ছিলেন; লেখার আনন্দে আগড়ম্ব বাগড়ম্ব লিখে যাওয়া তাঁর পক্ষে সম্ভব ছিল না; সুষ্ঠু, সুবিশুদ্ধ চিন্তাধারাকে রূপ দেবার তাগিদেই তিনি কলম ধরেছিলেন। হর্ভাগ্যত, অশেষ অধ্যবসায় সত্ত্বেও, উদ্দেশ্য এবং উপায়ের মধ্যে সেতুরচনা করতে তিনি সমর্থ হননি। যে-কোনো প্রকারে রচনাকে সর্বজনবোধ্য করতেই হবে, এমন একটা ধারণা তাঁকে পেয়ে বসেছিল। ফলে, মবল হতে গিয়ে প্রায়ই তিনি তরল হয়ে পড়েছিলেন, মাঝে-মাঝে একেবারে জলবন্তুল, এবং এইজন্য

মানসিক খুঁতখুঁতানিতে আজীবন তিনি অশান্তি ভোগ করে গেছেন। 'দু'-ইয়ারকি' নামক প্রবন্ধগ্রন্থের ভূমিকায় তাঁর আক্ষেপ খুব স্পষ্ট হয়ে উঠেছে: 'এ প্রবন্ধ কাঁচি যতদূর পারি সহজ করে লেখবার অভিপ্রায় আমার ছিল, কিন্তু ফলে দাঁড়িয়েছে এই যে, শিক্ষিত সম্প্রদায় ব্যতীত অপর কোন সম্প্রদায়ের নিকট এই প্রবন্ধগুলি সহজবোধ্য হবে না। আমার লেখা যে সহজবোধ্য হয়নি, তার জন্ত যতটা দোষী আমি, তার চাইতে বেশি দোষী আলাোচ্য বিষয়।' বস্তুত, এই ভণিতার প্রয়োজন ছিল না। কেননা আশ্রণ সরলীকরণের চেষ্টায় শেষ পর্যন্ত 'দু-ইয়ারকি'র অবস্থা দাঁড়িয়েছে না ঘরুকা, না ঘাটকা। বিষয়বস্তুর চরিত্র অনুযায়ী লেখার গড়নও-যে বদলানো দরকার, প্রমথ চৌধুরী তা হৃদয়ঙ্গম করতে পেরেছিলেন কিনা জানি না। কিন্তু আমার মনে হয়, যথাযথ অবস্থায় বীরবলী ভঙ্গিতে তন্নিত আলোচনা সম্ভব নয় বলেই, প্রমথ চৌধুরীর মতো মনীষীকে মূখ্যত টীকাটিপ্পনীর প্রায়-সাংবাদিক জগতে আজীবন অতিবাহিত করতে হয়েছে; বুদ্ধির ঠঙ্কল্যে ফুরধার, শ্লেষ-কটাক্ষে তর্ধক ইত্যন্ত-বিক্ষিপ্ত টুকরো-টুকরো কয়েকটি কথা ছাড়া আর কিছুই তিনি দিয়ে যেতে পারেন নি; আর সেই সব কথা তুথোড় আড্ডায় কফির টেবিলে বসে পেয়লা-পিরিছে অবলীলার সঙ্গে ঢেলে দেওয়া গেলেও, লবুকরণেই তাদের অনাকাঙ্ক্ষিত পরিসমাণ্ডি ঘটে। তাই ছুর্ভাগ্যক্রমে একজন জাত-সাহিত্যিক শেষ পর্যন্ত বোধ হয় ভাবাসংস্কারক, হিসেবেই চিহ্নিত হয়ে রইলেন।

'জাত-সাহিত্যিক',—কেননা, বস্তুত বীরবল ছিলেন লেখকদের লেখক। তাঁর গল্প বীদের উপর প্রত্যক্ষভাবে প্রভাব বিস্তার করেছে, তাঁদের মধ্যে অন্নদাশঙ্কর রায়, অতুলচন্দ্র গুপ্ত, ধুর্জটিপ্রসাদ মুখোপাধ্যায় এবং শিবরাম চক্রবর্তীর নাম বিশেষভাবে উল্লেখযোগ্য। প্রথম জনের হাতে বীরবলী গল্প নিঃসন্দেহেই পরমোৎকর্ষ লাভ করেছে; দ্বিতীয় জন, রবীন্দ্রনাথ এবং বীরবলের মধ্যে সেতুরচনা

করে নিজের অসামান্য শক্তিমত্তার পরিচয় দিয়েছেন; তৃতীয় এবং চতুর্থ জন, আমার বিবেচনায়, বীরবলের কয়েকটি বৈশিষ্ট্যকে নিজেদের মুদ্রাদোষ হিসেবেই কেবল আয়ত্ত করতে পেরেছেন। আর বীরবলের দ্বারা প্রত্যক্ষভাবে প্রভাবিত না হয়েও, তাঁর দ্বারা অল্পপ্রাণিত হয়ে নূতন প্রকরণের সন্ধান করেছেন সুধীন্দ্রনাথ দত্ত এবং বুদ্ধদেব বসু। এঁরা দু'জনেই বৃষতে পেরেছেন গল্পও কবিতার মতো কান দিয়ে শোনবার, একটি শব্দের কম-বেশিতে বাক্যের তাগ কেটে যায় এবং তার ছন্দ এবং বাঁধুনির জন্ত সময়বিশেষে ইংরেজি বাবুবিচ্ছাস-রীতির আশ্রয় নেওয়াই লাভজনক। গল্পের আদর্শ-যে তৈলচিত্র নয়, ভাস্কর্য—এঁরা তা অমুখাবন করতে পেরেছেন বলেই একাধারে বীরবলী রেখাশিল্প ও রাবীন্দ্রিক রূপক-উপমা-অলংকারকে নিম্নমভাবে পরিহার করতে এঁদের কষ্ট হয়নি। আমার মনে হয় তন্নিত আলোচনার উপযোগী 'সাহিত্যিক' গল্পের আদর্শ এঁদের হাতেই সূঠাম স্বাস্থ্যোজ্জ্বল একটা অবয়ব পেয়েছে। হরিজন আন্দোলনে যোগ দিলে-যে তাঁর জাতও যাবে, পেটও ভরবে না, সুধীন্দ্রনাথ দত্ত একথাটা ভালো করেই বুঝতে পেরেছেন। তাই স্বল্পসংখ্যক পাঠক নিয়েই তিনি সন্তুষ্ট। পঞ্চমস্তরে, বুদ্ধদেব বসু বিষয়বস্তুর চরিত্র অনুযায়ী লেখার চণ বদলাতে কখনোই ইত্যন্তত করেননি। বৈচিত্র্যময় তাঁর আঙ্গিক: হালকা রচনায় একরকম, তন্নিত প্রবন্ধে অল্প প্রকার, ছোটোগল্পে আবার ভিন্নতর। রবীন্দ্রনাথকে বাদ দিলে, বাংলাদেশের আর কোনো লেখকই বুদ্ধদেব বসুর মতো এতো বিভিন্ন আঙ্গিক নিয়ে এমন আশ্চর্য আর সার্থক পরীক্ষা-নিরীক্ষা করেন নি। সম্প্রতি 'জিথিডোর' নামক উপন্যাসে তিনি যে-গল্প ব্যবহার করেছেন তা শুধু অভিনবই নয়, ঐতিহাসিক। অল্প এক দিক থেকে প্রথম চৌধুরীর সঙ্গে বিশেষভাবে তুলনীয় অবনীন্দ্রনাথ, যদিও তাঁর গল্প সম্পূর্ণ অল্প জাতের, ভিন্ন স্বাদের। বীরবলী ভাবা যদি হয় ড্রয়িংরুমের, অবনীন্দ্রনাথের ভাবা তাহলে বৈঠকখানার। একদিকে যদি থাকে

কাউচ, অস্ত্রাদিকে ফরাস; একদিকে ডিক্যাণ্টার, অস্ত্রাদিকে আলবোলো। প্রমথ চৌধুরীর ভাষা যেমন আধা-তন্নিত ব্যক্তিগত রচনার উপযোগী, অবনীন্দ্রনাথের ভাষা তেমনি রূপকথা সৃষ্টির একমোহিতীয় মাধ্যম। বীরবলের কবিতাও-যে অনুপ্রাণিত ভক্তের সন্ধান পেয়েছিল, বিষ্ণুদে'র তেরজারিমা এবং ত্রিলোটা চণ্ডের কবিতাগুলিই তার প্রমাণ। যে-চৌদ্দমাত্রার কবিতায় বাংলা দেশে বিষ্ণু দে'র কোনো জুড়ি নেই, প্রমথ চৌধুরীর সনেটগুলিতেই তার সম্ভাবনা উপ্ত ছিল।

গল্পের প্রাথমিক লক্ষ্য যোহেতু আপাতউদ্দেশ্যসাধন, তাই দিনে-দিনে তার ভোল বদলায়। কিন্তু বীরবল যা করেছিলেন তাকে ভোল বদলানো বলা যায় না, তাকে বলা বেতে পারে খোল-মলচে পাল্টে দেওয়া। হাজারো অনুবিধাকে অস্বীকার করে একাধারে ব্যবহারযোগ্য এবং শিল্পশুদ্ধ গল্প লেখার বিস্ময়কর বৈপ্লবিক প্রয়াস হিসেবে তাঁর রচনা চিরকাল স্মরণীয় হয়ে থাকবে। আসল কথা হল এই যে তাঁর সংক্রামক ছুঃসাহস রবীন্দ্রনাথ এবং পরবর্তী প্রত্যেকটি উল্লেখযোগ্য গল্পলেখকের মনে আশুন্দ জ্বালিয়ে দিয়েছিল। তাঁর খজু চরিত্রে দোলাচলরত্নির স্থান ছিল না; তৎকালীন আরো অনেক স্মরণীয় ব্যক্তির মতো ছ'নৌকোর পা দিয়ে আজীবন তিনি বিশুদ্ধ ভগুমির পরিচর্চা করে যান নি। পাশ্চাত্তা শিক্ষার অন্তঃসারকে আত্মসাৎ করতে পেরেছিলেন বলে ফিরিঙ্গিয়ানার প্রতি তাঁর আত্মরিক ঘৃণা ছিল। এদিকে স্বদেশের প্রতি তাঁর অকৃত্রিম মমত্ববোধকে তিনি কখনো ছোলে স্বদেশিকতায় রূপান্তরিত হতে দেননি। কোদালকে কোদাল বলবার সংসাহস ছিল বলেই একটা বলিষ্ঠ ব্যক্তিত্ব তাঁর সমগ্র রচনায় পরিব্যাপ্ত। তাই বীরবলের হালখাতায় শুধু-যে একজন শব্দক্রীড়ের সাক্ষাৎ পাই তা নয়, একজন সর্বসংস্কারমুক্ত আধুনিক মনের অধিকারীকেও আবিষ্কার করি।

## সমালোচনা

ইন্দ্রধনু

উকী

রূপমঞ্জরী

কানাই সামন্ত। গিজাসা, কলকাতা। ৩, ৩, ২৭

নতুন কবির সংখ্যা বাংলাদেশে হয়তো বেড়েছে, কিন্তু নতুন কবিতার বই সে-রকম বাড়েনি। কাজেই আধুনিক কবিতা পড়তে হলে ছ'তিনটি সাহিত্য-পত্র আর নয়তো বহুপাঠে স্নানমলাট কিছু পুরোনো বইয়ের শরণ নিতে হয়। ছিঁড়ে গেলে, কি আরো পোতাগণ্যত আন্ত কোনো বই হারিয়ে গেলে প্রায় ক্ষেত্রেই আর-একখানা প্রথম সংস্করণই আনিতে নেওয়া চলে। কেননা কবিতা ঝাঁরা এখনো লেখন আর ঝাঁরা পড়েন তাঁদের মধ্যে কাদের দল ভারী সেটা ঠিক বলা যায় না। এ-অবস্থায় নতুন বই ছাপাতে পারেন একমাত্র তিনিই, যিনি দুঃসাহসী তো বটেই উপরন্তু ভাগ্যবান। ফলে প্রতিবেশী কবিদের এতে মনোকষ্ট বাড়়ে, পরস্পরের দিকে আড়চোখে তাকিয়ে তাঁরা দীর্ঘশ্বাস চাপেন। এই রকম ঈর্ষাসঙ্কারী ভাগ্যবান কবি হচ্ছেন কানাই সামন্ত। একখানা নয়, দু'খানা নয়, একসঙ্গে তিন-তিনখানা বই প্রকাশ করে তিনি আমাদের তাক লাগিয়ে দিয়েছেন। ১৩০২ সাল থেকে পঁচিশ বছর ধরে যে-সব কবিতা তিনি লিখেছেন তা থেকে নিয়ে এই বই তিনখানি গ্রথিত। তিনখানিই কাগজে ছাপার প্রচ্ছদপটে লোভনীয়।

তাঁর কবিতার প্রধান বিষয় প্রকৃতি। জীবনের, বিশেষত সমসাময়িক জীবনের বিচিত্র জটিলতা নিয়ে তাঁর কিছুমাত্র হুশিচ্ছন্দ নেই। একমাত্র বিশ্ব-প্রকৃতির লীলাই তাঁর কবি মনে সাড়া জাগাতে পারে। কবি হিসেবে সেটাই তাঁর বিশেষত্ব। এত ফুল, এত পাখি, আর এত গাছপাঙ্গার নাম সম্ভ্রতি আর কারো কবিতায় পড়েছি বলে মনে পড়ে না। চোখ ভরে, মন ভরে প্রকৃতিকে এরকম একনিষ্ঠভাবে তিনি ভালোবাসতে শিখেছেন রবীন্দ্রনাথের সম্পর্শ থেকে। আর সেই সব কবিতার বৈরাগ্যের একটি অনতিবাক্য বিষয় স্রবের ধারা প্রচ্ছন্ন।

বলার এমন কথা গুণিনীতে অল্পই আছে যা আর কেউ আর কখনো, কোনো-না-কোনো উপলক্ষে না বলেছেন। তাতে কী এসে যায়! বিষয়ের

মধ্যে ভো কবিতা নেই। কবিতা আছে স্নেহে, বলায়, রচনার বৈশিষ্ট্যে। একই বিষয়ে একশেষ কবিতা গড়ার পর সেই বিষয়েই নতুন আর-একটি কবিতা পথড় আমরা তাই মুগ্ধ হ'তে পারি। এখানেই আসে ভাবার কথা, ছন্দের কথা, উপমা-বাগ্জন্যের কথা। কানাই সামন্ত এখন পর্যন্ত এ বিষয়ে উদারগীর্ন।

কবিত্ব করতে তাঁর যে সংকেত নেই কবির পক্ষে এটা নিশ্চয়ই প্রশংসার কথা। কিন্তু তাই ব'লে—ভড়াগ, বরিব, শিহরি, রনিছে, বলকে (বলকায় অর্থে), হেরি, উছাসি প্রভৃতি অচল শব্দ তিনি কেমন ক'রে অসংকেতে বসান ভেবে পাই না। এই ক্রটি যেখানে নেই সেখানেই তাঁর রচনা উপভোগ্য।

যেমন :

ভিক্তে ছুটি ডানা বেড়ে নীলকণ্ঠ পাখি  
চকিতে মিলমিলে আশ্রবনের ছায়াতে  
বাদলের প্রাতে।

অনেকটা চীনে বা জাপানি কবিতার ধরন। 'হিন্দুধর্ম'র অনেক রচনা মনে হয় যেন গানের জন্ত লেখা। 'উষনী'তে রবীন্দ্রনাথ, গান্ধী, অবনীন্দ্রনাথের জীবনের সাধনা বিষয়ে কিছু দীর্ঘ কবিতা আছে। কিন্তু 'রূপমঞ্জরী'র সমস্ত কবিতাই ছোটো মাপের। এই চালের কবিতা বাংলায় কম। 'স্কুলিঙ্গ' বাদ দিলে, ছ'চার লাইনে আঁটোসাটো সম্পূর্ণ কবিতা কিছু পাওয়া যাবে হেমচন্দ্র বাগ্জীর রচনার। আলোচ্য কবিরও এ-দিকে হাত আছে মনে হয়। তিনি 'রূপমঞ্জরী'তে চীনে ও জাপানি কিছু অন্তর্বাদও প্রকাশ করেছেন। এর মধ্যে ২৩ আর ২৪ সংখ্যক কবিতার ভিন্ন অন্তর্বাদ আছে অজিত দত্তের 'কুসুমের মাসের' নতুন সংস্করণে। পশ্চিমী কবিতার প্রভাব বাঙালী কবিদের মধ্যে প্রবল। কেউ-কেউ পূর্বপন্থী হলে বৈচিত্র্য বাড়ি।

নরেশ গুহ

## ছোটোগল্প

### গ্রন্থমালা

পৌষ ১৩৫০-এ প্রথম প্রকাশিত হয়। প্রথম তেরোটি সংখ্যা নিঃশেষিত।

১৪. অভাগীর ঝগ	}	পূর্বদশী দেবী
মেঘ-মুক্তি		কামাক্ষীপ্রসাদ চট্টোপাধ্যায়
১৫. রেল-লাইন	}	অনন্য দেবী
১৬. যশোমতী		দেবীপদ ভট্টাচার্য
১৭-১৮. একটি সকাল ও একটি সন্ধ্যা	}	বুদ্ধদেব বসু
১৯. সাবিত্রী		পৃথ্বীশ রায়চৌধুরী
নতুন লেখক	}	অন্নদাশঙ্কর রায়
২০. হাসন সুখী		কমলাকান্ত
২১. মহাপ্রাণ	}	বিশ্ব বন্দ্যোপাধ্যায়
২২. মুখা		কল্যাণী মুখোপাধ্যায়
২৩. মুক্তি	}	পুষ্প বসু
২৪. উমিলা		রাজেশ্বর বসু
২৫. গামাধুস জাতির কথা	}	সুশীলজ্ঞান মুখোপাধ্যায়
২৬. পুনরুত্থান		প্রতিভা বসু
২৭. অপকৃপা	}	মসতি বেকটেন্স আয়ঙ্গার
২৮. আলো, আরো আলো		বুদ্ধদেব বসু
২৯. একটি কি দুটি পাখি	}	পরিমল রায়
৩০. ভবতার গণবাবু		ক্যাথারিন মাস্‌ফীল্ড
মেয়েরা	}	বিশ্ব বন্দ্যোপাধ্যায়
৩১-৩২. পাটির পরে		নরেশ গুহ
৩৩. বেনামী বসু	}	
৩৪-৩৬. তপতীর মন		

'একটি সকাল ও একটি সন্ধ্যা', 'পাটির পরে'

'তপতীর মন' প্রত্যেকটি আট আনা।

অন্ত্যাহ সংখ্যা পাঁচ আনা ক'রে। সবগুলি সংখ্যা একসঙ্গে পাঁচ টাকা।

এই গ্রন্থমালা সম্পাদনা করেছেন প্রতিভা বসু।

কবিতান্তবন : ২২২ রাসবিহারী এডিনিউ, কলকাতা ২২

**KAVITA**

**(Poetry)**

CALCUTTA

Vol. 15, No. 3, Serial No. 65

Editor : Buddhadeva Bose. Published quarterly by  
Kavitabhavan, 202 Rashbehari Avenue, Calcutta 29.

Yearly 6s. 6d. or 1 dollar 50 cents, Post free.